

04 MAR 1997

Mahathir - Yahaya

MAHATHIR, ANWAR ZIARAH JENAZAH YAHAYA

MARANG, 4 Mac (Bernama) -- Datuk Seri Dr Mahathir Mohamad dan Datuk Seri Anwar Ibrahim petang ini menziarahi jenazah Allahyarham Tan Sri Yahaya Ahmad dan isterinya Puan Sri Rahana Othman di kediamannya di Kampung Kijing di sini.

Dr Mahathir dan Datin Seri Dr Siti Hasmah Mohd Ali tiba di rumah Allahyarham pada 3.30 petang diiringi Menteri Besar Terengganu Tan Sri Wan Mokhtar Ahmad dan isteri Toh Puan Aishaitun Suhaimi.

Anwar dan isterinya Datin Seri Dr Wan Azizah Ismail pula tiba pada 5.10 petang.

Perdana Menteri kemudiannya memberikan penghormatan terakhir terhadap jenazah Allahyarham Yahaya dan Rahana sebelum menyampaikan ucapan takziah kepada dua anak perempuan mereka - Yatina, 24 dan Nadiya, 13. Dua anak lelaki Allahyarham, Ahmad Othman, 22 dan Ahmad Faez, 21 sedang dalam perjalanan pulang dari London.

Menurut pegawai pengiring Perdana Menteri, Dr Mahathir menangis ketika memberikan penghormatan terakhir itu.

Suasana pilu menyelubungi rumah Allahyarham ketika Dr Mahathir dan Dr Siti Hasmah tiba untuk menziarahi jenazah mangsa tragedi itu. Mereka berdua meninggalkan rumah berkenaan pada 4.20 petang.

Perdana Menteri yang kelihatan begitu sedih bagaimanapun membalas lambaian orang ramai yang turut berada di perkarangan rumah banglo yang terletak 200 meter dari pantai dan satu kilometer dari jalan utama yang menghubungkan Kuala Terengganu dan Kuantan.

Sultan Terengganu dan Sultan Pahang yang tiba bersama pada 3.40 petang turut memberikan penghormatan terakhir kepada jenazah Allahyarham dan isterinya.

Antara orang kenamaan lain yang memberikan penghormatan terakhir ialah Penasihat Ekonomi Kerajaan Tun Daim Zainuddin, Menteri Pendidikan Datuk Seri Najib Tun Razak, Menteri Pembangunan Usahawan Datuk Mustapa Mohamed, Menteri Pertanian Datuk Amar Dr Sulaiman Daud, Ketua Pergerakan Pemuda Umno Datuk Ahmad Zahid Hamidi dan Ketua Pergerakan Wanita Umno Datuk Dr Siti Zaharah Sulaiman.

Yang turut kelihatan ialah tokoh korporat Tan Sri Wan Azmi Wan Hamzah dan Datuk Amin Shah Omar Shah.

Beberapa anggota polis kelihatan berada di kawasan itu bagi mengawasi ribuan penduduk kampung sekitar dan orang luar dari seluruh negara yang berada di halaman rumah Allahyarham untuk memberi penghormatan terakhir. --

BERNAMA

RAR MAI